

Mid-Day Dogri News Bulletin, 29th Augst 2024

समे – 12:25

<><><><><><>

JK 2nd Phase Nomination

जम्मू कश्मीर च होने आले विधानसभा चुनावें दे दुए गेड़ लेई अज्ज अधिसूचना जारी कीती गई। आकाशवाणी जम्मू संवाददाता नै जानकारी दित्ती ऐ जे अधिसूचना मूजब नामांकन भरने दी खीरी तरीक 5 सितम्बर ऐ। 6 सितम्बर गी नामांकन पत्रें दी जांच आला कम्म कीता जाग। मेदवार जेकर चाहन तां 9 सितम्बर तगर अपनां ना वापस परताई सकदे न। दुए गेड़ तैह्त मतदान 25 सितम्बर गी होना ऐ। मतदान बडलै 7 बजे थमां शुरू होग ते संजा 6 बजे तगर जारी रौहग। दुए गेड़ च 25 विधानसभा हल्कें लेई मतदान होग। एह 26 विधानसभा हल्के गांधरबल, श्रीनगर, बडगाम, राजौरी, पुंछ ते रियासी जिले च फैले दे न। कुल 26 विधानसभा हल्कें चा कश्मीर खित्ते दे गांधरबल, श्रीनगर ते बडगाम जिले दे जिनें 15 हल्कें लेई मतदान होग उंदे चा कंगन, गांधरबल, हजीतबल, खानयार, हब्बाकदल, लाल चौक, छन्नापोरा, जेदीबल, ईदगाह, सैंट्रल छालटैंग, बडगाम, वीरवाह, खान साहिब, चरार-ए-शरीफ, चनडूरा शामिल न। जम्मू खित्ते दे रियासी, राजौरी ते पुंछ जिले दे 11 विधानसभा हल्कें च मतदान होग जेहदे च गुलाबगढ़, रियासी, श्री माता वैष्णो देवी, काकाकोट, सुंदरबनी, नोशहरा, राजौरी, बुद्धल, थन्नामंडी, सुरनकोट, पुंछ-हवेली ते मेंढर शामिल न। नतीजें दी घोषणा 4 अक्टूबर गी होग। जम्मू कश्मीर दी कुल 90 विधानसभा सीटें चा 74 सामान्य, 7 एससी मेदवार लेई ते 9 एसटी मेदवार लेई आरक्षित न। जम्मू कश्मीर च कुल 87 लक्ख 9 जहार मतदाता न।

<><><><><><>

JK-1st Phase Scrutiny

केन्द्र शासत प्रदेश जम्मू कश्मीर पैहले गेड़ तैह्त 24 विधानसभा हल्कें च वोट पाए जाने न। पैहले गेड़ लेई भरे गेदे नामांकन पत्रें दी जांच आला कम्म कल होआ। आकाशवाणी जम्मू संवाददाता दी रिपोर्ट मूजब 279 मेदवारें पैहले गेड़ तैह्त अपना नामांकन भरेआ हा। नामांकन पत्रें दी जांच मगरा 244 मेदवारें दे कागज पत्र वैध पाए गे। 35 मेदवारें दे कागज पत्रें गी खारज करी दित्ता गेआ।

अनंतनाग जिले च 67 मेदवारें दे कागज पत्र वैध पाए गे, पुलवामा च 46 मेदवारें दे, डोडा जिले च 34 मेदवारें दे, किश्तवाड़ जिले च 29 मेदवारें दे, कुलगाम च 26 मेदवारें दे, शोपिया जिले च 21, रामबन च 21 मेदवारें दे नामांकन पत्र वैध पाए गे। किश्तवाड़ जिले च 48 इंद्रवाल विधानसभा हल्के लेई 12 मेदवारें दे कागज पत्र वैध पाए गे, इस्सै चाल्ली 49 किश्तवाड़ हल्के लेई 10 मेदवार दे ते 50 पाड्डर नागसैनी लेई 7 मेदवारें दे नामांकन प. वैध पाया गेआ। डोडा जिले च भद्रवाह हल्के लेई 14 मेदवार डोडा हल्के लेई 11 मेदवार डोडा पच्छम लेई 9 मेदवार चुनां मैदान च न। रामबन जिले च रामबन लेई 12 नामांकन ते बनिहाल लेई 4 मेदवारें दे नामांकन पत्र वैध पाए गे। मेदवार जेकर चाहन तां ओह 30 अगस्त तगर अपना नामांकन वापस लेई सकदे न। पैहले गेड़ तैहत्त 23 लक्ख 27 ज्हार थमां बद्ध मतदाता वोट पाए दे अपने अधिकार दा इस्तेमाल करगंन। इंदे च 5 लक्ख 66 ज्हार युवा मतदाता न। पैहले गेड़ तैहत्त मतदान 18 सितम्बर गी होग। इस गेड़ तैहत्त कुल 11 लक्ख 76 ज्हार मर्द मतदाता ते 11 लक्ख 51 ज्हार महिला सनें 60 थर्ड जंडर मतदाता वोट पाने दे अपने अधिकार दा इस्तेमाल करगंन।

<><><><><><>

JKPC-1st List

औंदे विधानसभा चुनाएं गी दिक्खदे होई कश्मीर पीपुल्स कांफ्रेंस नै बुधवारें 7 मेदवारें दी पैहली सूचि जारी कीती। पार्टी दे अध्यक्ष सज्जाद गनी लोन होरें इस सूचि गी मंजूरी दित्ती। पार्टी दे वरिष्ठ नेता अब्दुल गनी होर राफीयाबाद थमां नजीर अहमद लावे कुलगाम थमां आबिद हुसैन अंसारी जादीबल, इरफान मट्टू ईदगाह थमां डॉ. बशीर अहमद उड़ी थमां आसिफ लोन बारामुला थमां ते हमजा लोन गुरेज थमां चुनां लड़गंन।

<><><><><><>

Rajouri Enconter

राजौरी जिले च बुधवार ते वीरवार दी मझाटली रातीं सुरक्षाबलें ते आतंकवादिएं बशकार टाकरा भखी पेआ। एह टाकरा उसलै शुरू होआ जिसलै आतंकवादिएं दी संदिग्ध नकलो हरकत दिक्खे जाने मगरा सुरक्षाबलें आस्सेआ इलाके च तपाशी अभियान शुरू कीता गेआ। आकाशवाणी जम्मू संवाददाता दी रिपोर्ट मूजब सुरक्षाबलें राजौरी जिले दी खवास तैहसील च तपाशी अभियान चलाया।

एह अभियान पुलस ते सुरक्षाबलें आस्सेआ सांझे तौर पर चलाया गेआ। इस्सै दरान आतंकवादिणं ते सुरक्षाबलें बश्कार गोलीबारी होई। 2 थमां 3 आतंकवादी इलाके च दस्से जा'रदे न। बाद्दू सुरक्षाबलें गी मौके आली थाहर भेजेआ गेआ ऐ। सोमवारें रातीं ग्राम रक्षा गार्ड दे इक समूह नै मैरां नगराटा ग्रां कश 2 बेपंछानू लोकें गी दिक्खेआ तोआई पुंछ जिले च सुरक्षाबलें आतंकवादिणं दे छप्पने आली इक थाहर दा पता लाइयै उत्थुआं असला ते बरूद बरामद कीता। सेना दी राश्ट्रीय राइफल्स आस्सेआ कीती गेदी कारवाई च सुरक्षाबलें डाची टॉप इलाके च कुदरती गुफा थमां 6 हत्थगोले बरामद कीते।



Haj Guidelines-2025

हज यात्रा 2025 आस्तै नमें दिशा-निर्देश मूजब लोक हज यात्रा पर जाई सकगंन। भारत दी हज कमेटी आस्सेआ जारी हुक्म मूजब 60 थमां 65 ब'रे तगर दी उमरी दे जायरीन हुन हज पर जाई सकदे न। 65 ब'रे आलें गी अपने कन्नै इक सैहयोगी लेइयै जाना होग ते ओह कोई बी होई सकदा ऐ ते ओहदी उमर 18 थमां 60 ब'रे बश्कार होनी लोड़चदी।



JMC Advisory

जम्मू नगर निगम नै लोकें गी सलाह दित्ती ऐ जे गैर-मंजूर कालोनी रीयल एस्टेट परियोजना च प्लाट नेई खरीदन ते निवेश बी नेई करन जिंदी जम्मू नगर निगम सरबंधत योजनाएं गी नगर निगम आस्सेआ मंजूरी नेई थहोई ऐ ते नां गै रीयल एस्टेट अथारिटी च पंजीकृत न।



National Sports Day

अज्ज राश्ट्रीय खेड्ड दिवस मनाया जा'रदा ऐ। एह ध्याड़ा हॉकी दे सब्बने शा शानदार ते बड्डे खडारी मेजर ध्यानचंद हुंदे जन्मदिन पर मनाया जंदा ऐ। हर ब'रे दे ध्याड़ा 29 अगस्त गी खेड्डे दी महत्ता बारे जोर देने लेई ते भारतीय हॉकी च मेजर ध्यानचंद हुंदे अनमुल्ले योगदान गी चेता नुआने दे कन्नो कन्नी उंदे सम्मान च मनाया जंदा ऐ।

युवा मामले ते खेड्डे सरबंघी केन्द्री मंत्री डॉ. मनसुख मांडविया होरें राश्ट्रीय खेड्ड दिवस दे जशन च हिस्सा लैने दे तौरा पर सब्बने गी बाहर खेड्डने आली खेड्डे च घट्टोघट्ट इक घेंटे लेई हिस्सा लैने दा आह्वान कीता ऐ।

